

『藤氏家伝』上 鎌足伝

家伝卷上 大師

内大臣、諱鎌足、字仲郎、大倭国高市郡人也。其先出自天兒屋根命。世掌天地之祭、相和人神之間。仍命其氏曰中臣。美氣祜卿之長子也。母曰大件夫人。大臣以豐御炊天皇卅四年歲次甲戌、生於藤原之第。初大臣在孕、而哭声聞於外。十有二月乃誕。外祖母語夫人曰、汝兒懷妊之月。与常人異。非凡之子、必有神功。夫人心異之。將誕無苦。不覺安生。大臣性仁孝、聰明叡哲、玄鑑深遠。幼年好学、博涉書伝。每讀太公六韜、未嘗不反覆誦之。為人偉雅、風姿特秀。前看若偃、後見如伏。或語云、雄壯丈夫二人、恒從公行也。大臣聞此辭、而窃自負之。識者属心、名誉日弘。寵幸近臣宗我栲作、威福自己、權勢傾朝。咄咄指麾、無不靡者。但、見大臣自肅如也。心常恠之。嘗群公子、咸集于旻法師之堂、讀周易焉。大臣後至、栲作起立、杭礼俱坐。講訖將散、旻法師擊目留矣。因語大臣云、入吾堂者、無如宗我太郎。但、公神識奇相、実勝此人。願深自愛。及崗本天皇御宇之初、以良家子、簡授錦冠、令嗣宗業。固辞不受、歸去三嶋之別業。養素丘園、高尚其事。俄而崗本天皇崩。皇后即位。王室衰微、政不自君。大臣窃慷慨之。于時、輕皇子、患脚不朝。大臣、曾善於輕皇子。宿故、詣彼宮而侍宿。相与言談、終夜忘疲。輕皇子、即知雄略宏遠、智計過人、計特重礼遇、令得其交。專使寵妃、朝夕侍養。居处飲食、甚異常人。大臣既感恩待、潜告所親舍人曰、殊蒙厚恩、良過所望。豈無令汝君為帝皇邪。君子不食言、遂見其行。舍人伝語於輕皇子、皇子大悦。然、皇子器量、不足与謀大事。更欲挾君、歷見王宗、唯中大兄雄略英徹、可与撥乱。而無由參謁。儻遇于蹴鞠之庭、中大兄皮鞋随毬放落。大臣取捧、中大兄敬受之。自茲相善、俱為魚水。後崗本天皇二年歲次癸卯冬十月、宗我入鹿与諸王子共謀、欲害上宮太子之男山背大兄等曰、山背大兄吾家所生。明德惟馨、聖化猶余。崗本天皇嗣位之時、諸臣云々、舅甥有隙。亦依誅坂合部臣摩埋勢、怨望已深。方今、天子崩殂、皇后臨朝。心必不安。焉無乱乎。不忍外甥之親、以成国家之計。諸王然諾。但恐不從、害及於身。所以共許也。以某月日、遂誅山背大兄於斑鳩之寺。識者傷之。父豐浦大臣愠曰、栲作如爾癡人、何処有哉。吾宗將滅。憂不自勝。栲作以為、已除骨鯁、方無後悔。安漢詭譎、徐頭於朝、董卓暴慢、既行於国。於是、中大兄謂大臣曰、王政出自大夫、周鼎將移季氏。公如之何。願陳奇策。大臣具述撥乱反正之謀。中大兄悦曰、誠吾之子房也。大臣欲求勢門之佐。陰探栲作之隙。乃知山田臣与栲作相忌。白中大兄曰、察山田臣之為人、剛毅果敢、威望亦高。若得其意、事必須成。請先作婚姻之昵、然後、布心腹之策。中大兄從之。遂聘女于山田臣之家。山田臣許之。及于三春忽至、百兩新迎、其弟武蔵、挑女將去。山田臣憂惶、不知所為。少女在傍。見父愁色、問曰、何悔之甚。父陳其由。少女曰、妾雖無西施之貌、当有嫫姆之情。願以妾納之。其父大悦、終進少女。中大兄怒武蔵之無礼、將行刑戮。大臣諫曰。既定天下之大事。何忿家中之小過。中大兄即止矣。然後、大臣、徐説山田臣曰、太郎暴逆、人神咸怨。若同惡相濟者、必有夷宗之禍。公慎察之。山田臣曰、吾亦思之。敬從命焉。遂共定策。即欲舉兵。中大兄曰、欲以情告、恐計不成。不告將默、又慮驚帝。臣子之理、何合於義。群公等、為吾陳説。大臣對曰、臣子之行、惟忠与孝。

忠孝之道、全国興宗。縱使皇綱紊絕、洪基頽壞。不孝不忠、莫過於此。中大兄曰、吾成敗在汝。々宜努力。大臣、於是、薦佐伯連古麻呂・稚犬連養網田曰、武勇強斷、膂力扛鼎。須予大事、但二人耳。中大兄從之。後崗本天皇四年歲次乙巳夏六月、中大兄詐唱三韓上表。時人以為、信然。於是、謂山田臣曰、三韓表文、使公誦白。乘其之怠、擬殺入鹿。山田臣許之。策既定矣。戊申、帝臨軒。古人大兄侍焉。使舍人急喚入々鹿々、起立著履、々三廻不著。入鹿心忌之。將還彷徨。舍人頻喚。不得已而馳參。大臣嘗知入鹿多疑、晝夜持劍。預教俳優、方便令解。入鹿咲而解劍、參入侍座。山田臣進誦三韓表文。於是、中大兄命衛門府、一時俱閉十二通門。時中大兄、自執長槍、隱於殿側。大臣持弓矢、為翼衛。賜箱中兩劍於佐伯連古麻呂・稚犬養連網田曰、努々力々、一箇打殺。以水送飯、咽而反吐。大臣嘖使勤勵。山田臣、恐表文將盡、古麻呂等、猶未來而、流汗浹身、乱声動手。鞍作恠問曰、何故慄戰。山田臣曰、近侍御前、不覺流汗。中大兄、見古麻呂等、畏入鹿威、便旋不進、咄嗟之。即与古麻呂、出其不意、以劍打傷入鹿頭肩。入鹿驚起。古麻呂運手揮劍、斬其一脚。入鹿起就御座、叩頭曰、臣不知罪。乞垂審察。天皇大驚、詔中大兄曰、不知所作、有何事邪。中大兄伏地奏曰、鞍作尽滅王宗、將傾天位。豈以帝子、代鞍作乎。天皇起入於殿中。古麻呂等、遂誅鞍作焉。是日雨下、潦水溢庭。以席障子、掩鞍作屍也。時論以為、忝天誅逆。而豐浦大臣猶在。狡賊未平。即入法興寺、為城以備非常。公卿大夫、悉皆隨焉。使人賜鞍作屍於豐浦大臣。於是、漢直等、摠聚族党、擐甲持兵、將助大臣、分設軍陳。中大兄、使巨勢臣德陀告曰、吾家國之事、不依汝等。何為違天抗捍、自取族滅哉。賊党高向臣國押、謂漢直等曰、吾君太郎、已被誅戮。大臣徒然待其誅決耳。為誰空戰、尽被刑乎。言畢奔走。賊徒亦散。己酉、豐浦大臣蝦夷、自尽于其第。氛沴滌除、材狼竄伏。人々喜躍、皆稱万歲。中大兄歎曰、絕綱更振、頽運復興者、實公之力也。大臣曰、是依聖德、非臣之功。衆咸服不其自伐焉。庚戌、天豐財重日足姬天皇、欲伝位於中大兄。中大兄諮於大臣、對曰、古人大兄、殿下之兄也。輕万德王、殿下之舅也。方今、越古人大兄而、殿下陟天皇位、便違人弟共遜之心。且立舅以答民望、不亦可乎。中大兄從之。密以白帝。帝以策書禪位於輕皇子。是為天万豐日天皇。實大臣之本意也。識者云、君子不食言。見于今日矣。奉号於天豐財重日天皇、曰皇祖母尊。以中大兄、為皇太子。改元為大化。詔曰、社稷獲安、寔賴公力。車書同軌、抑又此舉。仍拜大錦冠、授内臣、封二千戶。軍国機要、任公处分。大臣訪求林藪、搜揚仄陋。人得其官、野無遺材。所以、九官克序、五品咸諧。白鳳五年秋八月、詔曰、尚道任賢、先王彝則。褒功報德、聖人格言。其大綿冠内臣中臣連、功侔建内宿禰、位未允民之望。超拜紫冠、增封八千戶。俄而天万豐日天皇、已厭万機、登遐白雲。皇祖母尊、俯從物願、再忝宝曆、悉以庶務、委皇太子。皇太子、每事諮決、然後施行。於是、杭海梯山、朝貢不絕。擊壤鼓腹鄉里稍多。非君聖臣賢、而何致茲美。故、遷大紫冠、進爵為公、增封五千戶。前後并凡一万五千戶。十二年冬十月、天皇幸于難波宮。即隨福信所乞之意、思幸筑紫、將遣救軍、初備軍器。十三年春正月、御船西征、始就海路。三月、御船泊于娜大津、居于磐瀨行宮。天皇改此名曰長津。夏五月、遷居于朝倉橘広庭宮、以聽海表之政。至秋七月、天皇御体不愈。於是、大臣中心危柱、祈禱神祇、亦依三宝、敦求眉寿。璧像申臂而摩頂、觀音寄夢以現空。聖宥有所、煥然明矣。故、僧道頭云、昔者侍衛之

士、穀鳴而請死、節義之子、穿地而自殉。雲鳥掩日、令尹以身禱之、河神為崇、大夫求以牲焉。雖復美名勿朽、忠貞弥芳、而与今行懸殊。豈可同日而語哉。既而命遂有限、天皇崩于朝倉行宮。皇太子、素服稱制。是月、蘇將軍與突厥王子契苾加力等、水陸二路、至于高麗城下。皇太子、遷居于長津宮、猶聽海表之軍政。時謂侍臣曰、傳聞、大唐有魏徵、高麗有蓋金、百濟有善仲、新羅有庾淳。各守一方、名振万里。此皆當土俊傑、智略過人。以此數子、比朕內臣、當出跨下。何得抗衡。冬十一月、天皇喪至自朝倉宮、殯于飛鳥川原。十四年、皇太子攝政。契闊早年、情好惟篤。義雖君臣、禮但師友。出則同車並騎、入則接茵促膝。政尚簡寬、化存仁惠。遂使德被寰中、威懷海外。是以、三韓服事、萬姓安寧。故高麗王、贈內公書云、惟大臣、仁風遠扇、盛德遐覃。宣王化於千年、揚芳風於万里。為國棟梁、作民船橋。一國之所瞻仰、百姓之所企望。遙聞喜抃、馳慶良深。攝政六年春三月、遷都于近江國。七年正月、即天皇位。是為天命開別天皇。朝廷無事、遊覽是好。人無菜色、家有余蓄。民咸稱太平之代。帝召群臣、置酒浜樓。酒酣極歎。於是、大皇弟以長槍、刺貫敷板。帝驚大怒、以將執害。大臣固諫、帝即止之。大皇弟初忌大臣所遇之高、自茲以後、殊親重之。後值壬申之亂、從芳野向東土、歎曰、若使大臣生存、吾豈至於此困哉。人之所思、略此類也。七年秋九月、新羅進調。大臣、即付使金東巖、賜新羅上卿庾信船一隻。或人諫之。大臣對曰、普天之下、莫非王土、卒土之賓、莫非王臣也。先此、帝令大臣撰述禮儀、刊定律令。通天人之性、作朝廷之訓。大臣與時賢人、損益旧章、略為條例。一崇敬愛之道、同止奸邪之路。理慎折獄、德洽好生。至於周之三典、漢之九篇、無以加焉。即位二年冬十月、稍纏沈痾、遂至大漸。帝臨私第、親問所患。請命上帝求効。翌日而誓願無徵、病患弥重。即詔曰、若有所思、便可以聞。大臣對曰、臣既不敏。敢當何言。但其葬事、願用輕易。生則無益於軍國、死何有勞於百姓。即臥復無言矣。帝哽咽、悲不自勝。即時還宮。遣東宮大皇弟、就於其家、詔曰、邈思前代、執政之臣、時々世々、非一二耳。而計勞校能、不足比公。非但朕寵汝身而已。後嗣帝王、實惠子孫。不忘不遺、廣厚酬答。頃聞病重、朕意弥軫。作汝可得之任。仍授織冠、以任太政大臣、改姓為藤原朝臣。十六日辛酉、薨于淡海之第。時年五十有六。上哭之甚慟。廢朝九日。甲子、遣宗我舍人臣詔曰、內大臣某朝臣、不期之間、忽然薨謝。如何蒼天、殲我良人。痛哉悲哉、棄朕遠遊。恠矣惜矣、乖朕永離。何為送別之言、何為不送之語。非諺實是。日夜相携、作伴任使。朕心安定。云為無疑。國家之事、小大俱決。八方寧靜、萬民無愁。將茲辭為贈語、語鄙陋而不足。嗚々呼々、奈々何々。公獻說廟堂、於民自利。論治帷幄、與朕必合。斯誠千載之一遇也。文王任尚父、漢祖得張良。豈如朕二人哉。是以、晨昏握手、愛而不飽。出入同車、遊而有禮。巨川未濟、舟楫已沈。大廈始基、棟梁斯折。與誰御國、與誰治民。每至此念、酸切弥深。但聞、无上大聖、猶不得避。故、慰痛悼、小得安穩。若死者有靈、信得奉見先帝及皇后者、奏曰、我先帝陛下、平生之日、遊覽淡海及平浦宮處、猶如昔日焉。朕每見此物、未嘗不極目傷心也。一步不忘、片言不遺。仰望聖德、伏深係恋。加以、出家歸仏、必有法具。故、賜純金香炉。持此香炉、如汝誓願、從觀音菩薩之後、到兜率陀天之上、日々夜々、聽弥勒之妙說、朝々暮々、轉真如之法輪。既而公卿大夫、百官人等、皆赴喪庭舉哀。仍給司南方相羽葆鼓吹。送葬之日、路經闕下、親御素服步臨。勅令輟挽、對輻号泣感噫。自古帝王之隆

恩、宰輔之極寵、未有若今日之盛也。送終之具、困其遺言、務從節儉、以申宿志。粵以、庚午閏九月六日、火葬於山階之舍。勅王公卿士、悉會葬所。使大錦下紀大人臣告送終之辭、致贈賻之禮。于時、空中有雲、形如紫蓋。糸竹之音、聽於其上。大衆聞見、歎未曾有也。大臣性崇三寶。欽尚四弘。每年十月、莊嚴法筵、仰維摩之景行、說不二之妙理。亦割取家財、入元興寺、儲置五宗學問之分。由是、賢僧不絕、聖道稍隆。蓋斯之徵哉。百濟人、小紫沙吒昭明、才思穎拔、文章冠世。傷令名不傳、賢德空沒、仍製碑文。今在別卷。有二子貞慧、史。々別有傳。